

- 1<sup>r</sup> Manch narr der richt vß yederman
- 2<sup>r</sup> Vnd henckt der katzen die schellen an
- 3<sup>r</sup> Vnd will syn doch keyn wort nit han



## Hynderred der guten

- 1 Vil mancher der hat freüd dar ab
- 2 Das ich vil narren gsamlet hab
- 3 Vnd nymbt dar by eyn nützlich ler
- 4 Wie er sich / von der narrheyt ker

---

2<sup>r</sup> der GW5046 GW5047 ] des GW5041

5 Dar gegen ist es manchem leyt  
 6 Der meynt ich hab jm worgeseyt  
 7 Vnd gdar doch öfflich reden nicht  
 8 Dann das er schyltet das gedicht  
 9 Vnd henckt der katzen die schellen an  
 10 Die jm vff beyden oren ston /  
 11 Eyn rüdig rosß / lydt nit lang  
 12 Das man mit strygelen vmb es gang  
 13 Wyrfft man vnder vil hund eyne beyn  
 14 So schrygt der troffen würt alleyn  
 15 Dann wisßlich / ich mich des versich  
 16 Das narren werden schelten mich  
 17 Vnd meynen es stand mir nit zů  
 18 Das ich die narren stroffen dũ  
 19 Vnd yedem zeyg / was jm gebryst  
 20 Jeder redt / was jm eben ist  
 21 Vnd klagt sich / do jn druckt der schũch  
 22 Wem nit gefãlt diß narren bũch  
 23 Der mag wol lossen / das es louff  
 24 Jch bitt keynen das er es kouff  
 25 Er well dann witzig werden dar ab  
 26 Vnd ziehen selb die kappen ab /  
 27 Jch hab lang zyt gezogen dar an  
 28 Vnd will mir doch nit gantz ab gan /  
 29 Wer stroffet das er nitt verstot  
 30 Der kouff diß bũch / es dũt jm not /  
 31 Eyn yeder / was er sich verstat  
 32 Zũ dem er lieb / vnd neygunge hat  
 33 Wer worheyt wider sprechen gtar  
 34 Vnd wiß will syn / der ist eyne narr